

■ CONVIVENZA

In lieu da cuntrasts, colurs e sumbrivas

DA BETTINA CADOTSCH*

Il mument ses jau gist sin in sientamauns e ves davanti mai ina mar turchis, mes pes èn plain sablun e mes chavels èn tschurriclads da l'aua da sal. Jau n'aud nagut auter che la ramur da la mar. Qua hai jau la pasch sin terra.

Ier er'jau anc en in auter mund. Dapertut avevi autos che tibavan, umans che vendevan ornament sin las vias ed jau steva tranter millis persunas en la metro. Ier ma chattav'jau anc a Medellín, la segund gronda citad da la Columbia, oz sun jau a San Andrés, ina pitschna insla en la Caribica.

Ma enavos a Medellín. A blers da vus vegnan ussa forsia endament ils conflicts armads ed ils cartels da drogas. Quai è era stà ils patratgs da mes geniturs cura ch'jau hai ditg ad els nua che jau giaja en vacanzas. La criminalità è però mo ina part da Medellín e da quest bellezza pajais.

Quest viadi en la Columbia è mes emprim grond viadi. Per l'emprima giada hai tratg mai en in pajais dal tutfatg different da la Svizra. Differentas n'èn betg mo l'istorgia, la politica, l'economia e la cuntrada, mabain era la glied. La glied columbiana



na è fitg averta e sch'i resuna insanua musica, lura tut che sauta, ri e chanta. Ils blers indigens èn loschs da lur patria e savens han els grond plaschair che turists vegnan a visitar els sco er ils lieus ch'eran avant gnanc uschè blers onns anc fitg privlus.

Vaira impressiuant è stà in discurs cun in um da var 20 onns. El m'ha raquintà co ch'igl è stà da crescher si a Medellín en in quartier pover e criminal. Sia mamma haja ditg mintga di ad el ch'el duaja adina crair vi dal bun, ma era vi dal nausch. Cun quests plets ha ella vulì dir ch'el na duaja mai crair ch'il nausch tutgia mo ils auters ed el duaja adina esser precaut, la vita possia esser svelta a fin. Uschia haja el emprendì da stimar mintga singul di. Oz viva il giuvenot anc adina en quest quartier. Igl è in lieu nua che la glied viva vinavant a moda fitg simpla e senza luxus, ma en pasch. Da quai è el uschè losch ch'el

na less betg bandunar ses dachasa ed ir ad abitar en il center da la citad.

Ultra da la vart povra da Medellín hai jau era vis la vart ritga e la glied bainstanta. Per mai èsi tranteren stà fitg grev da vesair il foss tranter povers e ritgs e da pudair elavurar tut questas impressiuns. Igl è però stà bel da percorscher in sentiment d'ina renaschientscha. La glied construescha dapertut scolas, bajetgs novs, vias e centers d'inscunter. Blers Columbians m'han ditg ch'els veglian ussa guardar enavant e serrar giu cun chapitels stgirs.

Per scriver davart tut quai ch'jau hai passentà fin ussa durant il viadi tras la Columbia na ma tanscha la piazza qua betg. Ma jau poss dir ch'jau hai emprendì ch'in lieu po avair bleras differentas fatschas. Fatschas bellas, tristas, allegras, povras, ritgas, novas, veglias, tradiziunalas, innovativas e tranteren era dubiusas. Jau m'allegrel gia ussa da pudair turnar a chassa cun in satgados plain vestgadira tschuffa e plain experientschas e scuntradas ch'jau na vegn mai ad emblidar.

* Bettina Cadotsch è creschida si a Savognin. Ella studegia Multimedia Production a la Scola auta da tecnica e d'economia a Cuir e lavura tar Radio Südostschweiz e «suedostschweiz.ch».